

竹

初

詩

鈔

竹初詩鈔卷之十

武進錢維喬樹參著

姪伯垌

中錫

編次

子中鈞

孫潤斯
溱斯

校字

長句呈畢中丞秋帆卽以留別

當代有一韓荆州氣如渤海納衆流天教分陝得柱石
節旄拜作今諸侯初聞金馬操著述日下聲華公第一
偶陪葱轡聽鳴鳩因侍柏梁榮橐筆幃帷出莅涼秦域
遂以仙才擴治術能宣恩澤遍嗷鴻旋播平反及蟻蝨
單闕之歲 鑿輿東公行謁 帝趨岱宗數十萬逋乞
天笑西方佩璫皆春風是時蜀使開邛笮資公筦鑰當

關中儲胥轉畫得大計吏不中蝕民安農憶昔京華居
對宅吾家阿兄最相識相期定作黑頭公謂公之面長
一尺頻依麈尾得清吟却啖牛心懽永夕知人郗鑒竟
不爽入夢惠連空自惜十年賤子塵衣緇懷刺湯滅將
何之竭來太華見顏色猶似初逢愛我時虎賁中郎感
徒爾知公屋烏情未已唯愁重問呂虔刀只合聊分公
瑾米方今交道如流水對面檣花吹萬里幾人鄭驛置
長安不使故人寒至此終南西亘雲蒼蒼高牙夜卷秋
月涼閒閒錦暉得真本中丞收藏名蹟甚富坐嘯自近名山旁此
時東閣成良會別緒黃華緩衣帶他年更索張憑船一
幅斜陽寫清渭

贈別嚴侍讀道甫三十韻

昔我年十八識君金陵城春風動秦淮落日絃管清飲

君草堂內勝集羅羣英吳徐與王鮑

謂吳竹嶼秦來徐懸圃步雲王小樓

嵩高鮑禮

更有長髯程

程載園晉芳

諸子各磊落子亦心觥

觥就中據梧客乃是吾家甥

謂似

高談屬雲漢麗句紛

韶譔咸懷丈夫志願致公與卿何期廿年來聚散如麋

麋進者石函劍退者牆角檠獨餘濩落儔有若魯兩生

春明幾握手君尚壯氣盈一官雖不達亦據清要名忽

然晤關中須髮已半更謂言多病質少本薄宦情好鳥

偶出谷終思鷗鷺盟况兼白下區負郭差可耕誓釋短

後服親穫長腰秬聞此我三歎自苦身拘擿奔走屢南

北夢斷鷓鴣鳴徒爲佩絃直難罷作繭縈遙知仲蔚宅
徑草霜蕪平綠綺久曠彈幽蠹生書棚誰呼造物愛一
使息我照高秋望華嶽翠絕青柯坪君探玉井蓮手折
十丈莖我來負阮屐懷古徒怛怛偶然發短咏淒急伴
秦箏南飛有塞鴻毛羽慚孤征何時訪杜若一艇桃葉
橫

贈別秋厓姪

吾家累隱德七世皆儒冠恒以清白心窮達得所安年
來祚中落門戟摧琅玕屈指簪紱間中外無一官况兼
生理薄遺業唯青瑣縹緲散風雨後起誰能看豈必慕
顯達恩墜詩書傳今年跨驢出擯斥仍摧顏西來古頻

陽見子容依然宗族半飄泊各爲衣食艱骨肉得暫合
憂患彌相煎人情變覆手閱久窺無端貧賤未足憎所
恐自立難汲水須汲井使知恃本源種樹須種桐孤直
全其天爾年已三十學業猶迤邐我子逾十齡句讀聞
甫完念此一氣成榮悴終相連爾留我將去寧不中腸
酸秋風動秦隴落日鴈影單裘馬彼何人獨我愁衝寒
形骸雖日遠魂魄無關山努力各謀身毋爲忘故園

別曼亭

幾載形睽大道塵山窻握手倍相親一官君尚同寒士
三黜吾猶累故人夢裏秦關愁易合酒中燕市跡俱陳
生涯從此如涼月便共高天望未真

渭北江南此去分，繞朝無策贈殷勤。好從綠綺延朝爽，莫爲黃金感夕曛。雙影瘦俱侔野鶴，孤根飄又逐秋雲。鹿門何日成偕隱，容我朝朝見左芬。

對雨

五日頻山雨，開窗霧氣濛。天教停客騎，卽是石尤風。

聽雨次韻

人道雨聲惡，我道雨聲好。若吹明月到，客牀別夢多。於道傍草。

贈韞山

我生吝膠漆，執手無深知。恥逐洪忍人，顏腹交參差。管子今雋士，清譽南北推。奔走爲白華，生產不足治。雖縛

八珍絡繹未足感感此款款天之涯

有姪有姪年齒如六年遠宦隨其夫昔時膝下若嬌鳥
今見叔來嘯不了秦山悠悠秦水長西飛鴻鵠東鷺鷥
安能局促久留汝吞聲別去摧肝腸

遠道遠道使我憂渭城落月波自流鶯花鄂杜未得到
風雨嶠函空復愁我愁有加太華色西接秦中渺無極
疲馬徘徊爲我鳴歲暮衣裳生凜冽

男兒生不成名老漸催三十已過四十來蹉跎白日但
自惜道途百感生其懷故山杞菊霜滿眼果下輕車閒
不綰摧眉尚欲走風塵鱸膾應啗歸計晚

過華陰

策蹇寒郊徑獨尋來時風物憶題襟

前與韞山各
有望華之作滿林

紅柿兼霜葉映出青峯又華陰

張茅道中

連山勢蜿蜒起伏無定蹤細路盤蒼烟裊若蛇行空遙
睇千丈磴攀陟疑難從漸覺所歷高已入雲霧濛前驅
屢升降曲折循溪中一水渡百迴耳盡聲琤淙峯環窄
無地坦徑安可逢亂石何巒岈得間馬足通客來孟冬
序林壑生淒風回首盼秦隴離別心忡忡日月淹道途
夷險皆我躬焉能罷于役如彼巖畔農

曉發土壕

重岡崑日氣濕霧久未散稍稍林宇明霏霏曙烏亂高

田儼階級層列山之半樹柵出炊烟屋脊羣雞喚微青
麥隴平漸白霜逕斷晨曦悅衆動首釋僕夫憚從此得
過征吾行庶戒旦

過澠池縣

乍晴生馬力稍失客途艱寒日淡鋪野薄雲徐吐山荒
城思趙瑟故壘隔秦關慕藺平生意深慚飄泊間

戲楊生墮馬

楊生苦吟無間時遠道日成數首詩偶然跨馬陟隴坂
貪看岫色忘高低前行側帽漸自喜鞭絲在手慵不理
乍疑心孔入風雲忽覺眼光欹帶履翻身一蹉隨殘照
墮地聲猶出蚓竅扶持重上本康莊玉山自倒從人笑

君不見人生得意多所傾醉爲馬墜有杜陵三公縱許
兆折臂何如穩步相追仍怵哉易戒負且乘慎勿馳驟
虞友朋

萇宏墓

在偃師
縣東

西毫尋幽壟東周瘞昔賢孤忠曾入地多難匪違天古
道明禋缺斜陽碧草芊如何際嬴代殉國轉茫然

五更渡洛水

翠羽明璫夢未真寒臯空有水粼粼馬頭一片將殘月
曾照黃初作賦人

寄似擬甥潁陽署兼示韞山曼亭

聚散真成逆旅看相思初過月團圓地經鞏雒郊原古

人憶鄒枚賓從殘鴻信暗隨平野斷馬蹄晴入早霜寒
官齋此日停尊酒可爲征夫一倚闌

汴京懷古

天際河兼汴水流霜邊人作大梁遊屠沽已少夷門客
花石難消艮嶽秋事去盟書空北國時平戰壘失中州
兔園散後無文藻一醉相如欲典裘

弔信陵君

中原從主力能任兵法兼因下士深六國共推公子將
一符難得美人心魏亡竟至淪三版秦間誰教費萬金
過客空懷毛薛感更無守冢夕陽沉

鐵佛寺

在睢州城西相傳唐貞觀初
有鐵佛自水浮來因建此

野寺歸何所遺蹤古帝邱堂虛鐘半臥僧寂寂初休遠
水移龍象頽垣過馬牛荆碑貞觀字猶爲化人留

聞秦聲三首

繁絃急柝太淒清酒畔眞含變徵聲莫向斜陽歌不已
道傍猶有庾蘭成

渭城一曲隔秦關何意重聞野宿間說與離人渾不解
分明唱出念家山

絕調休嫌悞羽商善歌猶記在烹唐此行學得秦青技
誰向江南聽遶梁

懷韞山

黃鵠意千里青萍銑一身斯人有風義吾黨得交親夜

兩寒秦樹晨霜重洛塵遙知各相憶離合見天真

途中感懷同楊生作五首

一別江關便感秋功名幾復滯吳鉤西京未可長留庾
北海何因尚識劉丹篆早年曾記夢素絲岐路漸生憂
故園那得爲中隱款段聊隨馬少游

夕陽如畫送行鞭飄泊俄驚路九千

今歲就試南宮因遊秦中以歸計程

約九千里矣

有患豈惟妻子累不才所愧父兄賢魚龍故國

空搔首風雪殘吟易判年且遣愁心計程去還家春酒
得歡然

嘆逝猶餘笛裏身感時休談道旁輪文章白首須吾道
事業蒼生有幾人死憶衣冠孫叔涕遊兼琴酒馬卿貧

中原漫作登高望夜半鷓鴣聽最真

無才未敢賦長楊

日下諸公多有勸子明春
獻賦津門者余堅却之

劍外空歸

上計裝日短關河紛敗葉天清鷹隼入寒霜書生愛國
唯干羽旅客占時有稻粱早晚征西傳露布鏡歌吟到
白鷗鄉

高軒一過賞猶存薦陸徒驚先達尊海上仲連虛玉貌
塵中方朔少金門百年肝膽慙知己十口桑麻待感恩
從此潛名分吳市不教自食笑王孫

欲雪同楊生作

凜凜歲云暮客行嗟阻修凌晨出村墟况值寒威適始
疑門雨勢日脚黯未收脣空忽定色一氣凍不流但覺

原野濶入骨嚴風颭大道多疑陰十月霜滿疇飢禽與
敗葉雜下聲無休靄靄太古雲鴻鴈叫正愁前途蒼茫
際何地容做裘

入江南境有感

道途忘客務計里賤朝昏故國又將到壯懷有幾存寒
聲屯衆木雨氣滅遙村歲晚吾何樂歸裘漸不溫

往日

往日青門畔秋風照別顏笙歌雖衆裏去住總愁間月
柝沈孤館霜尊隔亂山安能把衣袂互審淚痕潛

偶成

已藉緋袍贈猶懷長缺歌一身慙特達八口恐蹉跎肝

瞻殊鄉易升沈俗眼多平生澆酒淚幾得趙州過

殘月

若非行客見幾逐曙光迷尚有蛾眉妬偏隨馬首低星
河迴別夢關塞入荒雞朧朧終相嬲吾知理亦齊

過洗馬河

今年東南久不雨一雨突漲洪澤湖支流溢作衆川滄
大者倒挾黃河趨我來古渡涉洗馬昔聞帶水茲具區
長橋半沒斷首尾古洞疑有蛟龍居驚濤黯黯變日色
盡歛朔氣侵人膚去年秋風夾冤子數萬戶口爲沮洳
星輅使者出巡問復以草竊中迴車長淮南北古澤國
十歲有九嗟其魚鱗冬蕩析集財半上游未可隄防踈

天寒牛馬散兩岸爭錢色忍操舟夫儒生忠信雖自審
性命終怯中流桴杠梁除繕繫王政誰告守土勤民圖
臨淮關
曉日生帆角邊淮斥埃新漁人成早市柳色繞通津僕
馬當風慣錢刀滯客頻買符終不賤關吏莫相嗔

咏道旁鷹

自有風雲色心無狐兔叢誰能脫塵外不使餓鞴中萬
里騰宛馬三秋勁角弓令人思猛氣射獵見英雄

紅心驛

古驛紅心過新愁綠髮深山猶淮北翠人有洛中吟遠
荻明兼水饑鴉靜出林爲期剛六日鄉夢免霜侵

望燕子磯

輕帆峽束吹如箭，突見危磯撲江面。
百丈崖傾烟霧間，險絕當年經百戰。
石城岌業在眼中，龍盤虎踞昔所雄。
千尋鐵鎖竟何益，一葉釣絲能有功。
六朝已遠豪華少，天塹空餘形勢繞。
誰向斜陽閱廢興，青山自古如飛鳥。

南至京口

空江鳴朔風，浩浩勢千里。
天水亘寒色，白鳥翔未已。
遙帆入雲定，遠日隨樹起。
洲渚迴衆姿，烟巒變新霽。
中流見浮玉，突兀心所喜。
舟楫久勞生，長波媿盈耳。

近家

短櫂年年別，衰顏冉冉加。
天邊隨倦鳥，江上惜明霞。
縱

跡慚人問情懷仗酒賒知誰憐仲蔚蓬徑又還家

抵家作

出門有所求歸路始自憐飛騰各乘運而我塌翼還遲
迴人里巷十步九不前行恐逢故知色沮非舊顏上堂
拜阿母敬問眠食安欲訴飄泊蹤氣結不得言辭家甫
一載已值災旱年中斗粟儲待我謀嚮餽嬌兒稍長
大弱女衣屢牽雖得骨肉慰生理虞迤邐天寒歲事逼
短景不我延烏雀飢易鳴亂下庭階問東鄰乞美酒且
遣百慮捐莫使春風嗔明鏡增華顛

爲畢中丞秋帆寫高秋登華圖并繫長歌

我聞太華山屹爲五嶽雄峻嶒拔地五千仞撐空一氣

削出朶朶青芙蓉甫申爲周翰嵩降本由爾作鎮來關
中亦與金根峙旃蒙之歲日重九修羊真人遠招手遂
屏車騎尋福庭前導不煩二茆狗巨靈高掌東倒河流
三峯矗霄雲泉瀉秋惟見盤盤天磴杳無極不知蒲池
石鼓名蹟縹緲從何求青鞵結束有神助况爲蒼生禱
甘靄鉤梯垂鑠危且思蟻附蛇盤得徐度聳身徑上絕
頂遊俯視但覺泰山羅列如盃甌金城千里現指掌八
水蕩蕩搖晴眸白帝宮鬱然起修懸沉熗蕭芷濃烟黝
黝化霧市靈之格兮近壬子用管輅語時頗望雨中丞
禱於金天宮隨得霧霽
乃知謝公絲竹非徒然傅巖霖雨真有此吁嗟人生蠟
屐關前緣幾人擁節能幽攀青蓮呼吸未易達昌黎書

札愁難傳名山非肯媚軒冕力與大雅開真源不然猿
獼猴攫愁莫到短筇一拄寧非天我時抱塵疴咫尺未
得從去聲悵望玉井蓮秋風不相送公有北苑瀟湘圖洞
庭張樂來仙姝瀟湘圖北苑真蹟爲董文敏珍藏有二
姝及鼓瑟吹笙者蓋取洞庭張樂地瀟
湘帝子遊意詳見
賦語今中丞得之我今寫此尚草草安知騎龍駕鹿他
日非吾徒

題金小笏雲區行樂圖

與君兩世交識君總角始愛君粲粲姿知君擅才綺經
年一會晤相託殊苦岑閭君有草堂未得把權尋玉峯
高復高結宇山之椒靜乃識魚鳥寂豈誅蓬蒿人生行
樂心強半匪簪絨不作彥倫慙何辭元亮乞賤于泉石

癖白首終相從他年訪張廌應避苦竹中

寄懷浣青兼示曼亭二首

別餘清渭咽悲笳每見封書淚似麻
夢裏秦城空帶月愁中吳苑漫飛花
出山小草猶無着託命長鑱只自嗟
安得生涯守三徑田園並種召平瓜

三千里外聯吟處六七年中會面期
老恐行藏無上策窮教骨肉少深知
贈袍范叔空懷遠斫地王耶易感時
異日水衡能濫用故人然諾更休疑

寄巨卿姪

西望崑函雨氣深依劉踪跡此浮沉
中年哀樂成子髮遠道音書見汝心
布被更誰憐仲海銅盤豈獨愛楊惓

故園桃李殊榮悴努力天涯作越吟

荅似撰甥見懷韻却寄

生計空遭薄俗疑清才半世各違時似聞早入河陽幕

更遣愁吟渚側詩

用韓伯浩送殷浩事

歎歲只應慙駱統

北歲不登頗有

道墮邑人爲食以餉餓者自愧力有未逮故及之

博徒豈足益袁絲前程與爾

俱無賴敢爲塵軀歎不貲

寄贈管大韞山

青山肯使舊盟寒蒼狗頻教世態看他日彥倫終作佛
何時元結漫爲官從知肝膽貧交易不信文章達命難
意氣如虹君所有相期早整切雲冠

荅楊蓉裳見懷之作卽次原韻

人生珍石交所貴在耦意苟非道義洽簪盍苦無地嗟
子拙投分不合恒掉臂落落二十年肺腑鮮深契比來
得楊子一見若昆弟文章互磨琢直擬金就礪始知飲
醇心惟淡乃益醉方聯蓉江詠旋悵蘭陵袂豈不戀同
方分馳爲生計君時居倚廬抱璞無所試我復從北走
飄散等秋蒂金臺扇春風歲變月累累長衢舞華鼓短
刺伺甲第但競繞指能如博注鉤藝得掾賴三語竊喜
投策祕回嗤碎琴客自合道左置捷足躡九關蹇步折
兩翅至竟誰厚顏徒制李廓淚承明七尺席割棄良易
易縱畏行路艱星駕敢安稅關中有親故憐我及璵細
爲惜久摧殘才猶可急使菽水匪嚙恥富貴亦疣贅擊

析求江關望雲勝燕薊指囷各不吝漑澤隨揭厲遂遣
暫還家雞鳴理管邇維時邑大飢博濟愧乘勢虞潭願
則孤黔敖功無二出門謀斗粟鵠面見輒悸絲竹彼何
人歡憂別涇渭梁溪春水泮一舸隔空翠不慮素心嗔
知我似縮蝟人情口惠多繪幻出鬼魅白首枉銜杯黃
金庶聯轡君懷五色筆定足擅兩制此日將母難四壁
類蕭寺顧慙浪士跡贈餌乏一筍捧檄知何時焚研已
廢事丈夫干青雲反掌判榮悴誓當共歲寒弗爲薄俗
累相思展尺素各灑斜陽涕努力隨飛鴻翱翔與天戾

聞金川蕩平誌喜二首

梗化宜天討徵師豈 帝心釜魚終不久穴鼠敢相尋

置尉求張奐追功陋杜欽 皇威從此暢但撫五絃琴
絕域經年戰 王師轉餉勞幸教兵氣解猶憶鼓聲高
華嶽看歸馬雲臺寫佩刀只應銘劔閣文采付吾曹

聞洪大禪存失館歸詩以慰之

丈夫艱自食出戶意多違將母家宜恤依人道易非關
河青眼倦風雨素心稀歸日看鍼線徒慚身上衣
相送花初落重逢月又升登堂少半涉返權失張憑故
國吾猶滯窮途汝豈憎且教同荷鋤一醉酒如澠

感懷二首示同好

廿年京雒賦驅馳書劔無成祇自疑元髻漸隨生計改
青山空與壯懷期知交所恨殊何武時命猶聞感趙岐

悔不江干訪漁父此身早逐世推移

張季寬平宜有子王珉譽望已輸兄佩刀漫遣貽前日
折屐惟應待後生關塞經時埋劍氣壺漿何處識簫聲
莫將犢鼻嗤南阮差喜行踪襍被輕

積雨歎

孟夏濕蒸動煩溽微潤礎陰陽久相薄日氣不自主積
晨檐雷鳴傾注鮮乾土燠寒并俄頃疹入驟難禦去年
魘爲災三月無寸雨田畦竟龜坼腰銍罷場圃江南數
郡飢流徙無定所哀鴻叫荒野藪澤委錡筥今春兆三
白民食幸可補芄芄日成熟到口有二哺何期變靈霖
偃臥紛莫數雖資中田菽

今年蠶豆大稔民頗賴以給

未足實倉庾

雨暘劃兩歲弗劑民乃苦始知一飽力造物權奪子

喜晴

夙聞食爲天洵哉天與食一夕判慈忍來牟本帝德淙淙急霽翻欹枕苦未息豈期晃朝曠失喜見日色吁嗟

輾轉腸疾癘已易逼愁霖更今夜麥性潛變忒

諺謂四月初八

夜雨最損麥雖收食之病人中虛復歐泄元氣堪耗蝕庶徵協人事

恒若患晷刻赤子終何辜旋轉恃大力齊民有方書連

宵枉占測佇待搜麩嘗殊美味稼穡

急就章云甘麩殊美奏諸君案

吳中吟六首

昔樂天作秦中吟以習尚非古寓意箴規深得風人之義予三十年來就所見聞歲殊月異爰

仿其意作歌六章

尺布謠

昔聞上留田兄死弟弗顧如何骨肉誼視之等陌路譬
諸手足殊持行用則互何待相摧擊畫守己失助粲粲
紫荆花榮枯感庭樹同根不自恤安論戚與故錙銖及
天倫財物勝厥父此風終不更毋乃交相瘡

裘馬歎

富者一飯費貧者數日糧富者一衣貲貧者數歲裳
翻少年子挾瑟求名倡被體必綈錦列几恒羔羊盤羅
易牙味腰繫陸賈裝持身豈不貴所貴名譽芳區區口
體間苦欲爭低昂造物忌盈滿暴殄恐有殃飽暖遺子

孫孰短孰則長斗米數十錢大布昔滿堂斗米數百錢
統綺今道旁况當大災稂鳩鵠形足傷誰能示以儉仁
義爲中腸

雞鳴起

晨雞喔喔鳴闐闐脊然起豈待雞鳴時錢刀夢先擬豈
惟市中人百族心類爾毘陵古樸壤物產昔無紀末流
乃負販羣習懋遷理琳瑯購遐方纂組覓近市珍奇極
搜采千里致筐篚竟侔三倍利貴賤中所喜魚鹽有王
佐貨殖未可鄙所懼毫末爭風俗薄由此

覆手雨

男兒重結納豈惟杯酒間一朝共雞壇死當豁心肝雖

殿五倫末恩誼期克完自從管鮑沒聚合如沙搏執手
作絮語中有千仞山殷勤爲策謀貌熱心已寒朱門易
分潤奔走承其顏白屋有乞求却之及盤餐錐刀可便
益子母權所歡寧但緩急難排擠至無端不如閉蓬門
獨處差自安

克園冊

南人得英華北學窮枝葉古語雖云然近者益浮雜束
髮授句讀訓詁但掇拾小學猶面牆老死空喋喋百金
市輕裘千金買美妾獨至延經師計較及絲粒後來出
黨塾名譽漫迨還簡編本糟粕况復鮮卒業縱復爲達
官吾恐書伏獵

牧奴戲

一擲輕百萬豪舉亦得名聖賢戒冥然博奕差可營揆
之惜陰義要非先民程無益害有益勝敗徒爲爭乞假
吝一錢金注囊甘傾中堂張穉瑜燒燭呼其朋但云夜
未艾豈識雞將鳴酒酣興未已餘貲及杯羹鄰有餓死
孀叩門方莫嚮

喜見月色

美人掩眉黛別幙經旬寧今朝持玉笛吹破萬重烟明
鏡不自滿清尊空記年夜深共竹語對影更誰憐

趙味辛以述懷四章見示詞意感慨作此解之

幽蘭不能言吐氣自殊俗玉軫雖倦聽響豈儕等筑世

人但識金鑿蹄伯樂見之掩口噲得者爲榮失者辱欲
豁衆眼無金篋平原公子才凌雲弱冠搖筆成雄文灑
然盡脫紈袴習胸中妍雅超其羣東南竹箭久不采發
爲謳歌含塊壘天將降任人豈知世自失士吾何罪贈
君海邊七尺之珊瑚佩君飛星麗綬之湛盧求非鐵網
弗輕得鸚膏拂拭無時無君年三十我逾八互審頭顱
欠作達我患謀生君不貧猶得讀書理刀札百歲亦轉
燭窮達徒紛然但見高軒化黃土幾曾肉食升青天鼠
肝蟲臂何真假我已憑呼作牛馬如君豈是蓬蒿人一
盞長虹爲傾瀉

贈洪稚存二十四韻

洪生干霄姿火色必騰上其才劔藏匣一出破犀象居
鮮負郭田室米謀斗益顧耽典籍與恥作牆立罔鵬騫
阻一間視之等糞壤唯懷將母心操管願求往予兄昔
論詩落落靳真賞見君樂府詞天末契清響南歸倚廬
暇顏巷駕先枉于時白衣冠徒步病須杖與我偕欵門
識面各快爽君來袖寸帙入口新吟朗細字排簡端封
還寄深獎五年感存歿共有西州桐衣褐雖襴衡知人
記樂廣君今嗜讀書敦行邁吾黨上堂進修隨怡怡盡
色養偶因負米旋不廢鍵戶想六經本忠孝要義非恂
悅但期掇枝葉終若隔痂痒南學患剽輕末流更標榜
文章不沉潛其氣徒佺攘名山有述作顯晦境豈兩慚

子自厓返勗子成器長

謝十一普德以其父任夔州別駕時郡中所作德政歌裝潢成卷見示索題因成短句

我聞古循良學道斯愛人志苟在黎庶其治恒寬仁干石小諸侯撫綏兼四民寧惟斂泉刀但潤長吏身囊橐亦易盡積罥徒申申卓哉東山君弱冠大郡分一官莅夔府善政次第陳便民及錙銖負戴俱啣恩胥蠹悉屏息市虎潛逃奔豈直劉寵潔足繼文翁淳令子感先德不敢自厭貧遺經受阿母鍵戶甘艱辛口碑揭通衢語質事則真非比諛墓文浮美揚其親謳謨卽史冊歲久墨未涇廉吏而可爲吾知在子孫

泊京口

一上孤舟思悄然親朋動是別經年天教謀食身無着
人到辭家色可憐雜樹空江初見月暗檣高岸欲生烟
鄉心何處非流水竟夕潺潺不肯眠

行近淮安覆舟作

我生未涉險窮年慣川途燕秦詰屈幾奔走江河播蕩
無時無區區忠信差自審託命篙楫心恬如豈意清淮
咫尺地頓易安流作危勢石尤三日苦不前半晌揚帆
轉失利初如欹器偶左注陡覺翻盆欲橫度怒濤射足
不自由亂木關胸更無路微軀已分爲波臣船尾一隙
忽脫身蟻蝨敢邀造物憫竟出習坎或有神須臾立岸

知幸免兩僕死灰色乍轉洪喬寄札半沉浮元叔空囊
徒檢點人生禍患焉可防輪摧豈必愿太行千金垂堂
古所戒一壺中流今則忘日暮驚沙暗津鼓短屋檠昏
聊起舞爭憐性命委狂風須識波瀾有平土

八月十五日夜宿官橋

天涯復此度佳辰繫馬茅檐一愴神千里獨來當濁酒
百年何處息塵輪荒荒野月圓偏易切切堦蟲聽最真
白髮高堂應計日豈惟虛幌夢征人

旅宿不寐憶同里故交得詩八首

鄭清如

四十遲聞達經師望轉加金環記羊祜石鼓辨張華儉

覺衣冠古貧猶乞與奢近來稱益友直諒得吾瑕

呂雲莊

會面非人力萍蹤敢自期當君歸里日是我遠遊時
刀札謀生賤田園行樂遲乘車望公等勿使鬢如絲

莊似撰

與爾久淪落浮名祇誤人艱難因負米聚散總逃津
青瑣輸時輩緇衣賦我辰新詩投玉佩愁絕渭陽親

管韞山

半世論交道才如管子希不辭傾肺腑爲足勵脂韋
渭樹空啣月齊雲獨拂衣聯茵前夢杳怕見塞鴻飛

蔣瑩溪

蔣詡吾良友長安屢寄書爲言須祿養弗復戀安居
以鴛原急堂溪兄南莊被議在與才應驥足舒桃根與桃葉待爾
賦同車

趙味辛

之子真風雅華門服古難航奇在圖史款舊有盤餐綠
蟻休頻醉朱絲莫曠彈吾軍猶可張一爲振儒冠

洪稚存

樂府傳華髮詞壇有霸才書能搜魯壁名已播燕臺傑
氣須寒餓深交尚草萊尸喪真不易懷刺費徘徊

楊蓉裳

當代無徐庾梁溪得嗣音才猶同韞玉俗竟少分金弱

弟爲秦贅新知感越吟

聞蓉裳筆
耕浙西

青雲宜努力劍氣不

終沉

驅蝗行

我來驅車過下邳羣蝗遍地走且飛田中久旱禾半槁
蝗無禾食但食草借問道旁叟此有長吏不何不撲殺
之令其跳躍患不休叟向前致辭此物不足怒官府遣
吏來吏復責我捕驅蝗蝗未盡乃更添衆蠹君不見城
濠邊水乾鵝鴨飛在田鴨能搜蝗啄蝗子鴨肥可食相
公喜

曉發東阿

遙坡散宿烟殘月下無色獨樹立道旁惺如恐行客驅

車上礫礫十步九傾側
隱隱村舍來熒火光四射
荒穢忽亂叫稍見草逕白
却憶高閣眠朝暎漏檐隙

曉發荏平

疎雨不壓塵隨風作晨涼
出門望古道烟樹鬱以蒼
城郭爾何如成火寒無光
前行豈知所但覺入渺茫
蕭蕭白楊落行子嗟無裳
仰視河漢斜隱約參與商
疲馬嘶不已去鴈鳴且翔
百族各羣遊而我獨徬徨
始知貧賤苦不得守故鄉

新店小憩

屋脊鳴雞亂炊烟日午初
荒庭屯敗犖小市集新蔬
牛馬爲羣慣塵沙得食餘
朝朝唯說餅那不倦驅車

夜宿留智廟醉後題壁六首

青袍七度走金臺，勲業何堪髻髮催。
燕領眞成投筆去，犢禪誰料入貲來。
秋風遼海空揮涕，夜雨湘靈莫奏哀。
一種人才分淪落，祇應塊壘付深杯。

明時如此拔幽淪，薦禰頻看士貢身。
敢擬石渠容散木，竟教塵海作勞薪。
變名梅尉非無地，捧檄毛生爲有親。
後日儒林與循吏，一編位置任他人。

儒冠投俗半，此池見盡擲揄悟。
已遲作賦料難逢，狗監從遊悔不逐。
牛醫五陵裘馬輪，同學一權尊鱸待後期。
解得封侯亦塵土，數奇李廣更休悲。

少小清才忝季方，阿兄期許太非常。
西窗聽雨眞如夢，

上國看花只自傷終遣聲名慚驃騎更無面貌似中郎

那堪回首茶山路斜日悲風墮白楊

先文敏兄號茶山兆域亦名茶山路

江山是處託身寬何用朱門乞所歡十畝柴桑思種秫
一官勾漏爲求丹早知軒冕論交易始信錢刀愛客難
手散黃金亦吾道好教戎嶠破顏看

浮生久已澹窮通行樂休辜百歲中寶劍不須求陸賈
草堂惟是待盧鴻新詩白社無餘子舊雨青門有數公
何日扁舟載書畫江干貫月指長虹

香城旅舍偶作倪黃小景有客索之其過客耶其
逆旅主人耶爲繫短句

北來半月迷塵土硯匣琉璃澗朝雨偶然繫馬見明窓

林壑撐腸狂欲吐青山一髮江之南有人蠟屐窮幽探
黃花如約肯依酒白鴈不來空卸帆作詩與君君不識
清閔蕭閒夢中宅幾生絲筆委秋風一幅雲烟更何惜

竹井司寇以先兄丙戌年所贈詩裝潢成卷屬爲

題跋因賦七律二首

文章自古藉知音何況存亡誼倍深一卷謳吟天畔在
十年風雨篋中尋青袍小弟寒猶昔白髮尚書感至今
多謝緘滕過珍重九原應見故人心

昔年郵寄阿兄詩曾向尊前說項斯

丁亥歲以咏梅十
二首致先兄司寇

見而賞之送
今猶存壁上雞酒橋公空有約人琴子敬不勝悲梅花
東閣應千載春草西堂又一時同是瓣香依杜老榜材

所愧負深知

陶然亭小集次莊上舍然乙韻

秋光容客鬢一醉復登臺
放眼青山在經心白鴈來
雨寒平楚近城古夕陽回
歸憶同游好無須感異苔

竹初詩鈔卷之十一

武進錢維喬樹參著 姪伯珂 中錫

編次

子中鈞

孫潤斯
漆斯

校字

出都之浙中作

家風墨綬豈嫌卑

祖父皆
為邑宰

况是懷歸遂所私 一第敢邀

明主惜

引見時
何以不中進士

上問

十年得與舊遊期

自乙酉隨
先兄學政

之任已
十稔矣

詩留篋笥慚先達

兩楮相公竹井司寇頗賞
余舊作每晤輒言及之 名

奏丹青感後時

上問汝能
畫對上沉吟少選

從此湖山容吏隱

折腰愁遣故人知

抵越後塵事促迫正月望日始獨登吳山作此

吳山雖復在城市亦有爽氣開人襟
頻晨冠帶伺巖側
山靈笑我非幽尋行裝已辦忽興發
自理雙屐凌高岑
春泥滑道不駐步野鳥喚客初流音
漸升頗怪雜霽晦
俯視烟霧漫平林江湖左右歛一氣
日所未到皆層陰
數峯隱約峙天表片帆想像循波心
青山無情人易老
十年重過愁登臨飢驅况復入塵土
名區何者容清吟
誰能濁酒爲我斟酒酣百感幸不侵
浮生蓬轉得自主
來朝一舸春江深

泊江口

烟水宿誠慣鄉關夢亦頻如何踏歌夜
偏是未歸人塔影千雲直江流漾月新
數聲村市鼓恨不結爲鄰

七里瀧

晴烟漠漠草萋萋
江外輕帆與岸齊
一枕灘聲眠不得
春山愁煞畫眉啼

釣臺

昔賢有高節
天子不得臣
而我獨何爲
作吏趨風塵
窮達無二道
豈必慕隱淪
摧眉復折肩
尋屈或尺申
客星燦終古
山翠排青春
千年瀧水長
垂竿復何人

晚泊蘭溪憶癸未秋與大兄竝宿於此存沒之感
何以爲懷

桐江西望仍今日
瀨水東流似往年
雙鬢漸衰長劍外
百愁都落暮帆前
雲山別夢空留月
骨肉同遊已化烟

繫纜一看陳迹在強持尊酒淚潸然

衢州道中

盡日灘聲裡舟行咫尺艱溪光留白鳥帆影出蒼山
結網漁能樂攤書客暫閒鄉心千里外空逐暮雲還

抵開化署口號三章

筆床茶竈舊綠慳枉說扁舟越水間差喜一官容拄笏
訟庭終日對青山

荒城如斗閉春風也復呼朋酒不空夜半灘聲喧枕畔
始知身住亂山中

幾許詩情待放衙平明鳩喚晚啼鴉舍旁更有元都樹
三月春深好看花

得家書

爲有高堂問翻嫌薄宦非那堪愁遠道猶是隔春暉城
小羣峰逼庭閒野鳥飛南陔蘭蕙茁徒遣夢中歸

喜姪序東至署

吾宗方漸落之子竟長貧詩句歸寒餓生涯聽鬼神把
鋤傷健婦姪去歲悼亡縫線憶慈親相見滋情話挑爨且及
晨

自開化赴郡作

繞郭雲山四望幽危溪一道水驚流春寒不散桃花岸
夜雨偏宜竹葉舟舟名羅鳥到小僅可容膝遠宦乍來如社燕獨吟
無伴媿晴鷗頻年夢斷西州路怕說三衢是舊遊

舟行望諸嶺

城中見山如髻鬢未得窈窕窺全顏一朝出郭競揖客
惟愁烟雨仍難攀長杉遠排勢不已百折飛泉界空起
幾多幽壑鎖雲中不遇搜奇虛屐齒我思人生駐足皆
前緣天風吹墮忽此間危難走石自含怒宿鷺見人未
改閒從來勝地非完璞轉遜荒區堪結屋誰移蒼翠到
鄉關他日青鞋憑往復

水碓

自得春榆益何嫌輻輳空數椽因水勢一飯亦天功響
急無宵旦輪旋雜雨風渾忘機事近道與漢陰同

過衢州學使署有感

畫戟塵飄鼓吹遲十年曾此共銜卮青山埋骨猶餘我
碧草傷心更爲誰吳越片帆銷落日江河短髮剩哀詞
只應嗚咽雙溪水不向離人住少時

晚發

月出太末城悠然見晴光遙山蝕雲斷野水粘天長薄
陰歛村清暗有烟中語數步一驚灘時疑驟風雨三春
遊子感千里故人情川途倦懷古歲月銷計程推篷當
永夕清夢飛江國寄語水邊鷗勞勞休笑客

懷爛柯山

三衢郭外環蒼山幽奇自昔通元關霞裳風佩不得見
琪樹瑤芝空復閒傳聞古有採樵叟杞菊一肩和露走

清泉引客靜相鳴野鹿見人馴自守白雲蓬蓬蔭舊苔
下有鶴髮雙徘徊探懷真訣闕靈液歛手淨容辨却灰
諦觀漸久神遊漠偃僂都忘此間樂不知巖際日輪馳
但見枰前松子落卽此山中失斧柯塵區圭組更如何
嵇生石髓應憐少漁父桃花敢厭多我謫南枝卽飛鳥
銘骨丹書在嗟咄願待仙人數局棋駐顏且免青絲白

停舟橫浦

小泊風生岸孤吟月到衣暗帆隨樹出宿鳥破烟飛雲
水看何極田園計總違多情堤畔柳爲我思依依

集杜題畫

朝日射芳甸仙山有舟航松林駐遺情萬里遙相望丹

砂負前諾靈芝冠衆芳參差谷鳥吟吹簫間笙簧洞門
盡徐步未暇杖崇岡華亭入翠微青嶂插雕梁雲氣無
處所碧海吹衣裳始知五嶽外威鳳自高翔

集李題畫

茲山何峻秀乃在碧雲中自從天地開茵萑金芙蓉側
疊萬古石錯落千丈松噴壑鳴紅泉翦竹繞芳叢銀臺
出倒景仰觀勢益雄好鳥集珍木雙飛入簾櫳攜壺酌
流霞倚樹招青童願言弄笙鶴謁帝蓬萊宮

題畫

碧山如畫畫如山總在幽人彩筆間一塢雪泉流不盡
只因飛鳥破烟還

疊浦平沙映夕林谿山佳處得春深松陰竹氣濃如雨
并作青暉到素襟

遠浦疎林夕照平烟中時有數帆橫不須苦憶江南岫
處處春山雨易生

雨後林巒展翠屏溪流如玉漱危亭惟應靜得雲山趣
拄笏朝朝眼自青

得浣青詩札却寄三十韻

人生如飄蓬去去忽不留復如天邊鳥謀食艱羣游一
日不相見形影難爲伴何況歲月遐兼以道阻修嶠函
四千里遠夢隨雲浮朝朝盼刀札及到意轉愁長安昔
將別坐汝車上頭且圖款語同未惜泥濺裘華筵啟大

府餞我羅清謳時於繚竹隙見汝鉛淚流骨肉爲生離
慰假婢僕儔牽車復把袂至竟驅鳴騶官衙此開緘觸
眼細字稠尺紙想裁疊手剔殘檠幽未審別後顏肥瘠
視舊不新詩二三首示我抒煩憂人情本太行旣悟無
深求如繩幾能直繞指何多柔平時縱笑晏遇事生戈
矛但使貞吾常安問薄俗媮爾叔宰彈丸僻處羣山陬
荒城數百戶小市未午休舊聞囹圄空今來增四囚始
知愧長吏德化未易優吟情廢裝牒矧雜錢刀謀板輿
隔曲江將母何時酬天涯各薄宦後會豈自由白髮恐
如期寒盟負溪鷗越山晴叠叠渭水春悠悠書成託征
雁何日達乾州

得管大韞山札寄荅

古之益友如鍼師視所病患力扶之出處雖睽道則合
韋弦千里能相遺我交管子頗未久氣訖已如金石壽
頻陽判袂兩載餘落月空梁幾搔首山城三月飛青蠅
退衙堆案集短燈一官獨立百無助尺書賴有天邊朋
書中愁我太選悞以火濟水任始勝方今治民在獲上
逢迎恐匪儒生能君才自足貢廊廟我已塵中辜玉貌
捫虱秦關有故人牧羊緱氏非同調羨君朗抱白日懸
感君風義無山川三年懷袖字不滅報章倘更憐拳拳
聞蛩聲

階蟲何太早首夏發哀音獨夜可無爾羈愁已自今霜

根經歲感山館此時心近曉
淒吟斷徒看碧草深

螢火

山城多雨氣草腐已生光
出影乍池畔低飛只樹旁
早能成濕化未可定炎涼
照字吾無取何論近太陽

泊焦堰

水宿依荒渚推篷獨夜閒
薄雲時礙月野氣暗藏山
吟卷歸孤櫂羈情失舊顏
唯應近流水試一弄潺湲

偶作

風塵何處乞閒身十畝空
教繫夢頻但到折腰心已倦
始知五柳是高人

宿舜峯莊

危樓無靜夜四面澗潺潺但覺涼侵幕不知月滿山
星河低衆影風雨失重關明發衣裳薄愁衝曉霧間

溪口道中

曉日澹嵐氣山行總似秋奔崖纔有徑怒石各爭流
人力籃輿并官程野色幽黃雲看被隴喜見麥初收

題金野亭玩月圖

自我來開陽三見明月圓荒城如斗罨山氣素影往往
迷蒼烟泛舟何似山陰道一曲鑑湖波渺渺天姥峯高
飛夢懸甌江潮濶歸帆小平生對月非一時豈惟烏鵲
巢南枝西馳秦隴北燕趙嫦娥千里恒相隨忽然雙鳥
墮於此間日蕭蕭雨不止水天清曠失前遊河漢橫斜

愁獨指野亭之圖
颯以秋誰歟
寫者逸興幽別情已散
楊柳岸詩思頓落蒹葭洲
百年幾見蟾光碧
舉杯長空
邀未得縱遣狂吟
庾亮樓能無苦憶
陶潛宅

題四季山水屏十二首

東風取次到湖山
春在西溪樹色間
幾託扁舟探芳信
萬重香雪曉雲環

疎林結翠水增波
雨後濃陰長薜蘿
料得過橋添野色
危亭攬盡好山多

洞口芊綿草色新
春岑曉靄黛初勻
霞光一片明如錦
豈獨漁郎可問津

遠澗潺湲帶淺沙
晚涼森木影交加
晴鳥一隊迎人過

指點青帘是酒家

長夏江村事事幽不分柳色與溪流
鳧鷖散處荷風起水榭時聞發櫂謳

高梧百尺倚雲屏竹影千竿繞屋青
閒向苔階調鶴罷卷簾依舊讀黃庭

竹栢參差護石臺結亭高入碧雲隈
奚童亦愛看山色手抱清琴喚未來

蒼崖一帶散晴光秋到平林木漸黃
是處水涯堪結宇松聲泉韻拂人涼

賓雁初飛水接天歸帆三五落霞邊
江程髣髴湘南路一角山城入暮烟

流水啼雅暝色分滿林楓葉落紛紛不知蕭寺門何處
但覺鐘聲出白雲

石磴蒼蒼有百盤行看飛瀑起巖端松濤吹作前山雨
正是樵蹊得嫩寒

雪後羣峰練影鋪銷寒江閣酒頻酌不須更寫豐年景
一一瓊瑤在畫圖

題黃信生獨立圖

蒼茫高詠亦神仙笠屐難教俗手傳幾許襟懷羞伍噲
雪中鴻爪未超然

幽情漫許尋圓滿晚翠何因訪嶧桐比似真禪無四大
只須拄杖倚清空

影形相荅有天真豈在逃虛始絕倫
添箇青山作依傍也應不礙漉陶中

獨往憑追老畫師

虞山黃鼎號獨往客

披圖岩壑絕扶持不如我

更忘形相一片孤雲寫照時

題許弦齋放犢圖

昔聞放麕翁一朝相中山亦有洗耳客
牽犢頰水邊林泉軒冕無二致
要以洒脫全其天黃金籠頭繒被體
何似水草供幽閒元度才情我聞久
子將月旦今相友偶然託意牧隴間
滿紙烟霞護身手生逢堯舜百不憂
讀書學稼兼可籌角鼻從人象公字一
蓑且臥斜陽地

寄浣青

已過三霜見影難，眼窮秦樹淚洸瀾。一時酒罷蒼茫別，
千里書來反覆看。江國雲霓方苦旱，草堂猿鶴定生寒。
那堪十口無依賴，索米勞勞有素冠。

各閱枯榮四十年

子與浣青今年俱四十矣

鬢絲屢逐歲華遷，空餘

白望無長策。一入黃塵只俗緣，骨肉誰憐風雨隔。詩歌
應有鬼神憐，蓴鱸亦是人間物。終許秋江共泛船。

寄崔曼亭

遠望乾州路直西，武功山月曉淒迷。知君官閣猶能詠，
愧我驚禽未定棲。雲雨覆翻交可絕，雞蟲得失物難齊。
惟應獨攬安于帶，鴻雁聲中感舊題。

瓶鉢今同下版僧，筆花前事記曹騰。浮雲隴樹秋無著

細雨湖窗夢未能有客還鄉誇食雁何人作賦續憎蠅
相思除却長安月皂帽天邊可得朋

陪鄭侍讀炳也邵太守閻谷太史二雲泛舟湖中

作

鶯居偶出郭豁眼慚青山如何瀟灑人負爾窈窕顏秋
風不散暑炎歊久閉關庶幾百頃湖滌此塵襟斑濃色
眷諸嶺遙光漾前灣衰荷臥欲折野竹亂未刪羣公悉
碩彥五馬能蕭閒雖忝羣展陪令德邈難攀金閨隔夢
想宴笑殊清班雙峰峙千古非肯高髻鬢軒冕容暫來
薜蘿期大還樓明夕陽外舫出淨淥間溪邊白鷗立晒
我幽興慳終當覓尊鱸一往弄潺湲

酬楊孝廉六士見寄原韻二首

襍穢風塵失舊歡，勝遊久已曉星殘。
烟波故國歸無所，絲竹中年別較難。
覆米休文應賦恨，贈袍須買肯憐寒。
丈夫一飯當酬了，可惜壺漿只獨看。
臥病聞君偶損歡，更勞問訊及彫殘。
詩歌入俗今皆是，風義兼師古所難。
炊釜因人殊未熱，水瓶改歲自知寒。
年來并乏湖山詠，歸日空囊澁共看。

和徐補桐方伯自山左赴浙留別濟南諸君原韻

檐帷一路繞星郵，魯水吳山遞有秋。
地藉屏藩分舊績，天教霖雨導前騶。
金章改綰知恩渥，竹馬重迎喜願酬。
總是民情殷望歲，南州應不異東州。

望岱如何未了青又從越嶠仰談經六渠自有兒寬疏
一雨初成蘇軾亭形勝盡歸才子座勲猷豈止大邦屏
紀遊五百新篇在不讓名山獨擅靈

有美湖山久播謠歡從僚屬逮芸蕘澄方雅量唯冰雪
行部深仁在黍苗袞繡東人新著愛酒漿南國舊寬徭
層樓四照添濃翠遙盼旌麾匪一朝

半載官書盡夜燈政成不愧玉壺冰長堤折柳勞如客
高閣吟梅澹過僧三錫芝泥 恩未艾一觴鶴髮健彌
增秋風鷺嶺天香滿會看扶鳩取次登

題蔣軼亭灌畦圖

士食舊德農先疇苟蒙素業安所求浮榮過眼一芻狗

坐失十畝黃花秋蔣侯半世作遠遊歸來故園非黑頭
幼輿岩壑貌自適泉明松菊吟生愁我披新圖三太息
頻以飢馱隙先澤幾人沃土易逢年何處幽隣堪卜宅
白雲溪邊溪水碧願君歲寒聊息跡有子可讀田可耕
他日長鑱莫輕擲

喜袁簡齋太史見過因至湖樓話舊賦呈六首

才子江南有寓公十年不見夢常通入門高論還驚座
對酒離懷各轉蓬生藉鶯花廢夜月老看笠屐趁壽風
石麟容我先摩頂

先生昨歲始
舉丈夫子

佳傳他時付若翁

自著荷衣少俗情草堂猿鶴竟尋盟偶然著作堪千古
便不湖山也一生金馬舊聞羈曼倚石羊終見訪初平

聊收神鬼爲譚助

枕中有子不語錄尙未成書

前席非求動

聖明

名園會記共招邀
烟水秦淮賦六朝
詞伯天教能白髮
酒徒人已半青霄
詩歌敢擬當垂手
宦境都先味折腰
今日西泠話蹤跡
可堪同聽雨瀟瀟

前輩曾勞說項斯
暮雲如畫誦儂詩

舊有暮雲如畫不成雨一聯先生頗

加歎賞

一官豈識猶淪落
十賚何當解別離
翠袖清尊行

樂地曉風殘月斷
腸時多因半世知
幾早頭白生兒字

阿遲

見先生舉子詩

家山秀絕數杭州
泛宅翻成客裏遊
公是季心能愛士
我如衛玠善言愁
烟霞抱癖偏難共
鴻雁隨陽且自謀
記取越吟他日慣
定容易地得菟裘

素衣慚愧化緇塵後願須煩一指津家有圖書千萬卷
遊兼褻屐兩三人儒林循吏憑青史越水吳山總淨因
海內推袁尙無羨輸公早歲便抽身

題王西霞太史還朝圖卽以誌別

皇州鶯轉又經年江國驪歌欲暮天詞賦自應趨禁
苑湖山猶復罨吟鞭相攜鮑靚原如宅此去班生本是
仙好向春明續前約臥看日影過花磚

席帽桑乾記舊裝觚稜雙爵望蒼蒼玉珂已斷三生夢
金谷難留十日觴采筆詞臣宜入畫塵衫下吏漫成行
何因却抱奚囊從柳色千條認建章

秦太守招飲片石居出示山樓晚眺之作卽席奉

和

青山入牖雨初無有客愁看草色蕪落日片帆遙適越
到江孤塔劃分吳涼依晚幕慚歸燕高識天風愧相鳥
只合追陪褰屐後永和楔事續新圖

題龔曉升小照

一邱一壑過之難况是山中盟易寒多鬪松根茯苓喫
便如塵世大還丹

知君家住太湖濱馬蹟龍游我舊隣安得數椽同結屋
種松栽竹乞閒身

悼姪

吾宗一何衰門祚屢遭災池草旣夢斷庭蘭復驚萎中

年涉哀樂風木連傷懷何況朞功喪八載淚六揮

自壬辰迄

今遭父母喪復蕙
兄弟兩姪變故

譬如樹方茂一夕嚴霜摧霜摧亦有

漸無此促迫來少壯相繼去存者寧不危

憶昨歲旣殘送我將適越依依盛川岸分手腸暗結

去冬

之官越姪相送至盛川
臨別黯然殊難爲懷

方謂生離苦豈知卽死別我行

爾暫留爾亡我則活始悔數日偕相棄何太急扁舟共

開卷語笑尙髣髴人生骨肉緣追悼成一失

吾兄位秋官頗如張釋之寬平以用法案牘并夕治謂

空門闊擴何忽喪兩兒或言刑曹職肅殺其所司保無

一夫冤失入禍暗貽此語殊未然榮悴會有期仁貪報

顏跖天道難盡知庭堅邁種德猶致不祀疑

彭殤理一致駐世本小劫嗟汝七尺軀未得遂成立

歷代羅聞人

越姪有手鈔
歷代聞人錄

小史手鈔輯頗懷好學志不獨

事涉獵一官雖未達期可繼先業况蒙

聖朝恩

天

語問屢及胡爲棄人世竟與晨露溘開篋見汝書欲展

淚先濕

汝母年六十熒熒安所主汝姊隔秦關音信未敢與繫

子羈宦海頭顱已爾許一朝癡叔身復如車失輔兩代

成三孀牽幃淚如雨遺孤各髻髻未覺失爺苦告汝兄

弟魂黃泉急拜父冥漠好扶持何以支門戶

昔讀昌黎文淚灑十二郎平原祭姪帖手摹不成行以

爲至性存觸之感中腸豈知遵此戚短折屢見戕秋深

茶山路悲風號白楊宿草乍萋綠新棺復駢藏哭送者
何人遲我奠一觴哀鴻叫夜月落木飛寒霜曲江尙不
遠魂魄來我旁

次沈琳圃贈華毅甫原韻

官舍綢繆賦束薪清才一一出風塵暫來下若銷愁地
共作中年感遇人江畔魚龍懷故國城邊刀尺結寒鄰
預憐腰瘦東陽客走馬燕臺獨送春

既荅琳圃贈詩意有所感復次前韻奉荅

狔犬真看媿析薪漫勞絳帳展清塵退衙差喜成三益

華毅甫王申岳皆
有酬作故及之

解權先愁少一人

獻歲琳圃當
計偕北上

好鳥

還山曾未卜蜚鴻得路更難隣何當永遂鱸鄉願一舸

明湖共討春

琳圃見贈之作已酬荅矣復次韻一首

熱中須學釜抽薪儉節猶慚甑起塵漸恐二毛能誤客
尙因五斗欲求人畫禪已遜楊无咎書拙難同蔡有隣
寄語故山松菊在柴門好自護晴春

琳圃以詩勗兒子感其意復和之以示儆

淪落當思冬月薪眼前紈袴悉浮塵只知驥子須慈母
那得牛醫出可人著膝穿應求管榻就燈讀不藉匡鄰
慇懃已負明師訓轉贖蓬心又一春

疊韻贈王申岳

襤被宵寒擁濕薪一檠堆案苦生塵青瑣擬乞君家物

白袷從誇世上人，斫地高歌應未老。
渡江短檝幸相鄰，若非隔院邀清詠。
滿眼霜葩負小春。

疊韻贈華毅甫

翁子功名歎負薪，機雲遊洛感衣塵。
才從拔俗難知己，文擬牢愁要解人。
老恐調脂思北地，貧休撲棗守西鄰。
年年椰汁濃於酒，可要天街踏早春。

復疊前韻贈琳圃毅甫申岳

諸公才悉後來薪，賤子飄如大道塵。
此事廢真緣作吏，當時壯已不如人。
扁舟江上辜前約，長笛山陽感舊鄰。
一賦廣平心已倦，梅花非復故園春。

琳圃屢疊前韻不已，毅甫恐其苦吟作詩止之，予

不復和以此解嘲

才思今如火盡薪邯鄲那更步前塵
文通筆管還何日平子瓊瑤報有人
高唱便容叅下里餘光祇合借東隣
尊前且共酬寒歲莫待魂銷南浦春

菊影和李大令韻

柴桑贈荅記前師夢到籬東覺後疑
幻迹祇應尋老圃秋光偶爲寫殘枝
從教晚節人廻盼便乏生香客暗知
誰遣傳神如我瘦澹中臭味不差池

題佛像畫冊十二首

大士現身願在普度本甘露心及恒
沙數介福王母以慈爲航作壽者相
悅豫且康

觀音

四部無碍播自月支心香意藥貝葉紛披譬如孔門傳
經代出鸞音龍步各爲治術

繡經

至人振錫言從西來伎伎濯濯馴擾仙胎旃檀五百功
德具足位名壽外必得其祿

鹿

度索有桃三千年熟方食知獻于猿之族標人人識靈
粟仙禾阿羅漢頌作者東坡

獼猴獻果

衆香續紛布爲花雨維摩斗室乃來天女說法云何超
出聲聞尙有結習仁者見仁

散花天女

尊者舒指放大毫光瓊樓示現仙禽雙翔暨震旦國咸
歸鶴苑數不可紀永協箕衍

添籌

寶幢前導聿登崇階如吾之意老安少懷悉達所居善

持石室後先當路得大法力

獅

蟠幡字髮杖信雲門靈芝五色徧滿由旬以清靜心證

長生道陋彼隱君商山之皓

採芝

曇邕結茆廬山之趾來獻七箸福神叅禮金輪玉鏡蔭

照大千乘爐授教彌天道安

福神

佛說青蓮光明映徹一一葉上現七寶色華平嘉木瑞

圖所收曰無量壽請祝雍州

華平

文殊應世說經鏗鏗龍女受持演爲大乘衆生赤子合

掌供養慶慰得捨是名壽相

龍女受經

大力負荷執冠神功厥惟香象屹然稱雄金色白毫身

眉斯備子孫繩繩視育正宇

象

重至湖州賦投承太守

吳興清遠畫相空，乞郡今來風雅師。
曾逐篠簜迎大道，太守到郡余已卸長典事矣便登鈴閣荷深知。
及瓜緣歎陪吟屐，把菊情教共酒卮。
猶幸閒身泛茗雪，得從政暇聽論詩。

四十無間轉瞬過，一爲塵吏更蹉跎。
謀身總覺同鳩拙，食古安能似蠹多。
夜雨蘋洲波展纈，秋風弁嶺翠生螺。
明珠薏苡應能辨，肯遣尊前喚柰何。

王午堂都督招飲卽席占贈

薄宦經年得素心，別時臭味更相深。
詩留藤笈頻翻看，午堂有遊作一卷屬子評酒近霜葩肯細斟。
華髮未能

求大藥，塵衣空復對遙岑。
菰城舊雨唯君在，萬一扁舟

可再尋

瀕行午堂以詩賦別依韻酬之

半月汀洲解纜回孤篷不遣兩眉開
殘檠漸闇吟牋字細雨難添別酒盃
但覺錢刀能滯客應知圭組最妨才
思君從此如涼雁夜夜飛尋水一隈

題平太史瑤海還丹駐世圖

瑤海先生瑤海籍偶然仙骨從天謫
金門游戲非所耽風塵何况王喬舄
今年識面虎頭城修髯炯目癯而清
六時薰禮求大覺君好內典清淨便有還丹成
人生駐世亦小劫富貴何異巢蚊睫
但能解脫到朱門不礙光明留白甕
蒼山岩堯高人雲玉爐偃月含網緝
陰陽和合藉

法喜五銖環珮超聲聞此圖示我增歎息煩惱方爲折
腰客何時相從陟太行手中石髓飛靈液

題花卉畫冊十二首

芳訊南枝早能開百卉先何須凝冰雪映日倍暄妍紅
梅迎春

能傳富貴名不獨顏色好花中推第一洛譜費研考牡丹

爲憶江南雨霏霏社後前琅玕肯相倚絳雪總成仙杏花

翠幄密當軒紫雲香近手寧惟類鳶蘿兼亦垂組綬藤
花

問種塗林遠朱房曉露凝年年對蒲酒多子有前徵榴花

九苞分麗質六出擅幽姿香色雖殊別含薰總一時鳳

盈堦清不厭飾鬢香堪數月明照枕函翩翩來翠羽茉莉翠雀

大葉疎含態柔葩碧有情何須尋怨淚菊婢亦馳名秋海棠藍菊

高風陶令籬美德羅含宅餐英訂騷譜唯此稱壽客菊花

巧笑空臨水酡顏可拒霜銷城花萬朶驗取淺深粧芙蓉

蓉

具有黃中德恒春色略同梅兄與攀弟交映玉玲瓏
水仙長春

簇餘擬丹砂駐顏充綠酒寫作歲寒圖春風能耐久
天山
竹山茶

主司屬填草榜作

十載塵迷季子裘自慙投筆未封侯難將涕淚思前事
且看風雲壯上頭姓氏驚人爭一日文章憎命恃千秋
平生敢擬劉司戶榮辱旁觀亦動愁

名心於此久應寒一間南宮未達難抱送有人方作佛
椰揄無鬼漫爲官秋風幾變青衿髮春草從疲白道鞍

士氣奮騰公等在却勞俗吏爲彈冠

試院作小畫贈鄭太守楓人

棘院天教一月閒枯毫染出墨斑斑可知俗吏曾中物
尙有江南秀絕山

九日偕鄭太守明遠樓登高

鎖院清秋日氣森岑樓聽鼓一登臨萬間廣廈才人命
三寸毛錐烈士心風月南宮振昔夢湖山歲月發愁吟
何時萸菊歸親種莫待霜華兩鬢侵